

È mi ferma di tè, un surisu secretu
Chì cerca in lu mio pettu, l'ardente zitellina
È mi ferma di tè, a chjoma luminosa
Di una stella ascosa, cascata in la mattina
È chì vene à l'incontru di a mio vita

È mi ferma di tè, cume un ricordu santu
Chì cerca lu so cantu, in la tomba smaritu
È mi ferma di tè, u ventu chì s'intesta
À spuglià la furesta, à l'auturnu finitu
È chì vene à l'incontru di a mio vita

È mi ferma di tè, u fiume maestosu
Chì fala furiosu, à l'assartu di e plane
È mi ferma di tè, quella dolce carezza
Chì scacciava a tristezza, da ogni lindumane
È chì vene à l'incontru di a mio vita

È mi ferma di tè, quella lacrime amara
Di una zitella cara, chì cercava un destinu
È mi ferma di tè, quella ferita vecchja
Chì ogni tantu si specchja, nantu à lu mio caminu
È chì vene à ripiglià la mio vita